

Declaration du Roy,

Portant descharge à tous ses Sujets contribuables aux Tailles de la moitié de ce qu'ils deuoient porter en l'année mil six cens trente sept, des Tailles, Creuës: & autres leuées ordinaires. Et rejett de l'autre moitié par forme de prest & Emprunt en ladite année seulement, Sur les Villes & Bourgs principaux de ce Royaume: A la charge d'estre rembourcez du principal & interrests dudit Emprunt, suiuant ladite Declaration.

*Publiée en la grande Chancellerie de France le
18. Decembre 1636.*



A P A R I S,
Par Guillaume Citerne Imprimeur & Libraire ordinaire de sa Maiefté, & en la
Varenne du Louure,
1637.

81

Case

F

39

1326

1637 f.s.d

THE NEWBERRY
LIBRARY



L O V Y S par la grace de Dieu, Roy de France & de Nauarre. A tous ceux qui ces presentes Lettres verront, salut.

Les iustes considerations qui nous ont porté à faire la guerre ouuerte aux anciens ennemis de ceste Couronne, nous obligent à nous tenir en tel estat, que par la force de nos Armes nous puissions empescher leurs progrez, & mettre à fin les desseins que nous auons projettez: Par le moyen desquels nous esperons faire reussir vne bonne & durable paix à cet Estat, & à toute la Chrestienté. Et pour cet effect estant necessaire de tenir sus pied vn grand nombre de gens de guerre dedans & dehors nostre Royaume, tant par Mer que par Terre, & de pouruoir à leur solde, entretenement & subsistance en telle sorte que nos suiets ne soient en aucune façon surchargez & oppressez par leur passage & sejour, ainsi qu'ils ont esté par le passé. Comme aussi pour subuenir aux despences de l'entretienement de nostre Maison, Celle de la Royne nostre tres chere Es-

pouse & compagne; & de nostre tres cher Frere vnique le Duc d'Orleans. A quoy il nous est impossible de satisfaire sans vn secours present & certain des deniers de nos Tailles, Taillon, Creües, & autres leuées ordinaires: Lequel ne pouuant attendre de nos sujets du Plat Pays, à cause de leur misere & pauureté; Nous n'auons point trouué de moyen plus iuste que de les descharger de la moitié de ce qu'ils deuoient porter desdites Tailles, Taillon, Creües & leuées: & rejeter l'autre moitié par forme de Prest & Emprunt sur les principales Villes franches, Villes Taillables & Abonnées, ou qui payent la subuention, & Bourgs principaux qui le peuvent mieux porter. Moyennant quoy lesdites Villes Taillables & Abonnées, ou qui payent la subuention, & Bourgs principaux, ne payeront aucune chose des leuées auxquelles ils eussent peu estre cortisez en ladite année prochaine pour lesdites Tailles, Taillon, & autres leuées, Abonnement & subuention. A la charge de nous secourir par nosdites Villes franches, & par lesdites Villes Taillables, A-

bonnées & gros Bourgs, par forme de Prest
 & Emprunt en l'adite année prochaine seu-
 lement, Des sommes à quoy chacune des-
 dites Villes & lieux sera taxée en nostre
 Conseil, Payables en trois ou quatre pa-
 yemens. Duquel Prest & Emprunt lesdi-
 tes Villes & Communautéz seront rem-
 bourcez: ensemble des interets sur les le-
 uées qui seront ordonnées pour cet effect:
 & deschargez des logemens desdits gens
 de guerre, & autres contributions gene-
 ralement quelconques. **A C E S** Causes,
 Sauoir Faisons, qu'après auoir faict met-
 tre ceste affaire en deliberation en nostre-
 dit Conseil, où estoient aucuns Princes,
 Officiers de nostre Couronne: & autres
 grands & notables Personnages: De l'A-
 uis d'iceluy, & de nostre certaine science,
 plaine puissance & autorité royalle, Nous
 Auons Dict; Declaré & ordonné: Disons,
 Declaron & ordonnons, Voulons & nous
 plaist, que tous nos Sujets des Villes &
 Bourgs Taillables, Abbonnez, ou qui
 payent la subuention, Parroisses & Faux-
 bourgs d'icelles desnommez en l'Estat que
 nous en auons faict expedier ce iour d'huy

arresté en nostredit Conseil, Demeurent deschargez en l'année prochaine mil six cens trente sept: Comme nous les deschargeons par ces presentes signées de nostre main, De tout ce qu'ils deuoiẽt porter à cause des Tailles, Taillon, & solde des Preuosts, Creuë extraordinaire de nos Garnisons, Surtaux de nostre Cauallerie, Solde de nos gens de guerre, Abonnement & subuention: & autres leuées & impositions ordinaires: Et que des sommes à quoy montent lesdites tailles, creuës & leuées, il en sera seulement imposé & leué la moitié en ladite année prochaine en la maniere accoustumée, sur tous nos suiects contribuables des Villages & Parroisses du Plat Pays, Suiuaut nos Lettres de Commission qui seront expédiées pour cet effect: ausquelles lesdites Villes & Bourgs mentionnez audit Estat ne seront compris. Et quant à l'autre moitié attendu le soulagement que lesdites Villes & Bourgs receuront de ladite descharge: aussi qu'ils seront remboursez du principal & interets des sommes ausquelles ils seront taxez, Nous voulons & ordonnons

que ladite moitié soit departie sur toutes nos Villes franches, villes Taillables & Abonnées, ou qui payent la subuention, & gros Bourgs, Parroisses & Fauxbourgs d'icelles suiuant ledit Estat, sur les extraicts particuliers qui en seront faicts, collationnez par l'vn de nos amez & feaux Conseillers & Secretaires, qui contiendront ce que chacune desdites Villes & Bourgs, Parroisses & Fauxbourgs d'icelles devra porter: Et lesdits extraicts enuoyez aux Maires & Escheuins, Consuls, Scindicqs & Marguilliers desdites Villes & Bourgs, avec nos Lettres patentes; Pour estre par eux procédé en leurs loyautéz & consciences, à l'assiette & departement des sommes contenues ausdits extraicts: & lesdites sommes imposées & leuées par forme de Prest & Emprunt en ladite année prochaine seulement, en quatre payemens égaux de deux mois en deux mois, dont le premier escherra au dernier Feurier prochain, sur tous les Habitans de nosdites villes & Bourgs, Parroisses & Fauxbourgs d'icelles, Ecclesiastiques, Nobles, Nos Officiers domestiques & Cōmençaux: Tous

autres Officiers , & autres personnes de quelque qualité & condition qu'elles soient ; Exempts & non Exempts, priuilegez & non priuilegez , nonobstant leurs priuileges & exemptions, sans aucuns reseruer n'y excepter pour quelque cause & occasion que ce soit: Ausquels priuileges, exemptions, & affranchissemens que aucunes desdites Villes & personnes y demeurans pourroient auoir , Nous auons desrogé & desrogeons par ces presentes pour ceste fois seulement , & sans tirer à consequence pour l'aduenir. Et qu'au payement des Taxes & cottitez de chacune desdites Villes & Bourgs à cause dudit prest & Emprunt, les Habitans d'icelles seront contraincts par toutes voyes deuës & raisonnables, nonobstant oppositions ou appellations quelconques , & sans preiudice d'icelles ; desquelles si aucunes interuiennent nous auons reseruë la cognoissance à nous & à nostredit Conseil, icelle interdite à tous autres Iuges. Pour estre les deniers dudit prest & Emprunt receuz par ceux qui seront commis par lesdits Maires & Escheuins, Consuls, Scindiqs & Marguilliers

guillers, qui les feront voiturer dans le sus-
dit temps de deux en deux mois, en la vil-
le de la Generalité où ils ressortissent, es
mains de ceux que nous commettrons
pour en faire la recepre autres que les Re-
ceueurs generaux de nos Finances: Aus-
quels, ensemble aux Receueurs particu-
liers des Tailles & Taillon, & tous autres,
Nous faisons deffences de s'en tremettre
en la recepte desdits deniers, à peine d'in-
terdiction de leurs charges: A ce qu'ils
soient vtilement & sans aucun diuertisse-
ment employez à la subsistance de nosdits
gens de guerre, & de nosdites Maisons
Royales, dont pepend celle de cet Estat.
A quoy il nous est impossible de satisfaire
sans l'assistance dudit prest & Emprunt:
Le tout suiuant les Estats de distribution
qui en seront par nous arrestez. Et en cas
que lesdits Maires & Escheuins, Consuls,
Scindicqs, Marguillers desdites Villes &
Bourgs puissent sur leur credit emprunter
ce qu'il leur conuiendra pour subuenir
ausdits prest & emprunt, sans proceder à
ladite imposition & leuée, nous leur auons
permis & permettons par ces presentes,

d'emprunter lesdits deniers : & pour le remboursement, & des intereſts, d'impoſer à commander du premier iour de l'annier prochain en vertu de ces preſentes, Tels droicts qu'ils eſtimeront raiſonnables ſur les denrées & Matchandiſes entrans eſdites Villes & Bourgs, & Fauxbourgs, ou autrement, ainſi qu'ils aduiſeront pour le mieux pendant vne ou plufieurs années iuſques au parfait remboursement de ce qu'ils auront emprunté, & des intereſts: ſans qu'à faute d'auoir obtenu par eux nos Lettres de conceſſion & permiſſion : & icelles faiēt reſgistrer en nos Cours des Aydes, & ailleurs, lesdits droits & impoſitions puiſſent eſtre retardees, à la charge d'enuoyer par lesdits Maires, Eſcheuins, Conſuls, Scindicqs, ou Marguilliers, dans trois mois l'eſtat deſdites leuees & impoſitions, ſur leſquels nous ferons expedier nos Lettres neceſſaires, & icelles reſgistrer par tout où beſoin ſera. Et pour apporter plus de facilité & de credit auxdits Maires, Eſcheuins, Conſuls, Scindicqs & Marguilliers, Nous voulons que ceux qui auront faiēt preſt de leurs de-

niers pour satisfaire audit Emprunt, soient
 remboursez par preference du principal
 & interests sur les deniers qui seront ainsi
 imposez, sans qu'ils puissent estre imputé
 à partie dudit remboursement aucune
 chose des sommes à quoy lescdites Villes &
 Bourgs, Parroisses & Fauxbourgs d'icel-
 les deuoient estre taxez en ladite année
 prochaine à cause desdites Tailles &
 Creues, Taillon & solde: Creues extra-
 ordinaires, de nos Garnisons, Abonne-
 ment ou subuention, ou autres leuees:
 dont à quelques sommes qu'elles se puis-
 sent monter, Nous les auons d'abondant
 delchargez & delchargeons. Et où il arri-
 ueroit retardement du payement de la
 contribution & cottité dudit prest & em-
 prunt dans lescdits termes susdits par aucu-
 nes desdites Villes & Bourgs, Parroisses &
 Fauxbourgs d'icelles: Ce que nous ne pou-
 uons croire de l'affection qu'ils ont tous-
 iours tesmoignée à nostre seruice, & au
 bien de cet Estat: & principalement en vne
 occasion si importante: Nous serions con-
 traincts à nostre grand regret d'ordonner
 la subsistance de nosdits gens de guerre sur

lescites Villes & Bourgs, & Fauxbourgs
 qui manqueroient à payer ladite contri-
 bution, & d'y faire contraindre lescits
 Maires & Escheuins, Consuls, Scindicqs,
 Marguillers, & autres en leurs propres &
 priuez noms, solidairement & comme
 pour nos deniers & affaires. Comme aussi
 aduenant que lescites villes & Bourgs,
 Parroisses & Fauxbourgs d'icelles contri-
 buent volontairement à leur cote-part du-
 dit Prest & Emprunt, Nous les auons de
 nostre grace particuliere deschargez &
 deschargeons pendant l'annee prochaine
 de tous logemens de nosdits gens de guer-
 re, & autres contributions a cause de la
 guerre generalement quelconques: & leur
 ferons pourvoir sur le remboursement
 des Estappes qu'ils ont cy deuant auan-
 cées, fournitures de cheuaux, gens de
 guerre, & autres despences qu'il leur a
 conuenu faire en l'annee derniere, & la
 presente à l'occasion susdite, Suiuant la ve-
 rification qui en sera faiëte par les Com-
 missaires à ce par nous deputez. Si Don-
 nons en Mandement à nostre tres cher &
 feal le sieur Seguier Dautry Cheualier,

Chancelier de France, que ces presentes
il fasse lire & publier en nostre grande
Chancellerie, le Sceau tenant: & registrer
és Registres d'icelle: & le contenu faire
garder & obseruer sans qu'il y soit contre-
uenue; Nonobstant tous Edicts, Declara-
tions, Reglemens, Arrests & choses à ce
contraires: Ausquelles nous auons desro-
gé & desrogeons par cesdites presentes, à
la coppie desquelles deuëment collation-
nees par l'un de nos amez & feaux Con-
seillers & Secretaires; foy sera adioustee
comme à l'original. En tesmoin de quoy
nous y auons fait mettre nostre scel: Car
tel est nostre plaisir. Donné à Noisy le dix-
huitiesme iour de Decembre, l'an de gra-
ce mil six cens trente six: Et de nostre re-
gne le Vingt septiesme.

Signé, L O V Y S.

Et plus bas, Par le Roy, Deloemenic: & scel-
lé du grand Sceau de cire iaune sur double
queuë.

Leuëe publiee le Sceau tenant, de l'or-
donnance de Monseigneur Seguier

Cheualier, Chancelier de France, moy
 Conseiller du Roy en ses Conseils, &
 Grand Audiancier de France present:
 & registrée es Registres de l'Audiance
 de France, A Paris le dixhuitiesme iour
 de Decembre mil six cens trente six.

Signé, Demonceaux.

Collationné à l'original par moy
 Conseiller Secretaire du Roy,
 & de ses Finances.



